

ელექტროენერჯის განაწილების მომსახურების ხელშეკრულების სტანდარტული პირობები

ელექტროენერჯის განაწილების მომსახურების ხელშეკრულების სტანდარტული პირობები (შემდგომში - „სტანდარტული პირობები“) შემუშავებულია „ენერჯეტიკისა და წყალმომარაგების შესახებ“ საქართველოს კანონისა და საქართველოს ენერჯეტიკისა და წყალმომარაგების მარეგულირებელი ეროვნული კომისიის 2021 წლის 28 ივნისის #19 დადგენილებით დამტკიცებული „ელექტროენერჯის გამანაწილებელი ქსელის წესების“ (შემდგომში - გამანაწილებელი ქსელის წესები) მოთხოვნების შესაბამისად.

I. ზოგადი პირობები

1. წინამდებარე სტანდარტული პირობები წარმოადგენს წინასწარ ჩამოყალიბებულ, მრავალჯერადი გამოყენებისათვის გამიზნულ სახელშეკრულებო პირობებს, რომელსაც ერთი მხარე: ელექტროენერჯის გამანაწილებელი სისტემის ოპერატორი¹ (შემდგომში - „სისტემის ოპერატორი“) უდგენს ყველა იმ შესაბამის ელექტროენერჯეტიკულ საწარმოს (შემდგომში - „მიმწოდებელი“), რომელიც ახორციელებს ელექტროენერჯის მიწოდებას საბოლოო მომხმარებლისთვის.

2. საკითხები, რომლებიც არ არის მოწესრიგებული წინამდებარე სტანდარტული პირობებით, რეგულირდება გამანაწილებელი ქსელის წესებითა და საქართველოში მოქმედი კანონმდებლობით.

II. ხელშეკრულების საგანი

3. სისტემის ოპერატორი ვალდებულია, ელექტროენერჯის განაწილების მომსახურება გაუწიოს მიმწოდებელს, გამანაწილებელი ქსელის წესებით და საქართველოში მოქმედი კანონმდებლობით გათვალისწინებული პროცედურებისა და პირობების შესაბამისად, ამ მიმწოდებლის მიერ ამ მომსახურების საფასურის დროულად ანაზღაურების პირობით.

III. ელექტროენერჯის განაწილების მომსახურების ანგარიშსწორების წესი

4. მიმწოდებელი პასუხისმგებელია სისტემის ოპერატორისა და გადამცემი სისტემის ოპერატორის მიერ გაწეული მომსახურების საფასურის დროულად და სრულად ანაზღაურებაზე, გამანაწილებელი ქსელის წესებით დადგენილი პირობებისა და პროცედურების შესაბამისად².

5. წესების შესაბამისად, განაწილების ლიცენზიატის მომსახურების ანაზღაურების უზრუნველყოფა ხდება, მიმწოდებლის არჩევანის შესაბამისად, დეპოზიტის მეშვეობით³ ან მომხმარებლის მიერ გადახდილი მომსახურების საფასურის გამიჯვნის და მიმწოდებლის, სისტემის ოპერატორის და გადამცემი სისტემის ოპერატორის საბანკო ანგარიშზე ასახვით. დეპოზიტი შესაძლოა მიმწოდებლის მიერ ნებისმიერ დროს ჩანაცვლდეს საბანკო გარანტიით.

IV. მარეგულირებელი კანონმდებლობა და დავების გადაწყვეტის წესი

6. წინამდებარე სტანდარტული პირობები რეგულირდება და განიმარტება წესებისა და ზოგადად საქართველოს კანონმდებლობის შესაბამისად. სტანდარტული პირობების რომელიმე დებულებასა და კანონმდებლობის ნორმას შორის რაიმე წინააღმდეგობის, შეუსაბამობის, ან ბუნდოვანების შემთხვევაში, პირველ რიგში მოქმედებს წესებით და შემდეგ ზოგადად საქართველოს კანონმდებლობით განსაზღვრული შესაბამისი ნორმა (ნორმატიული აქტების შესახებ საქართველოს კანონის პრინციპების გათვალისწინებით).

7. წინამდებარე სტანდარტული პირობებიდან გამომდინარე ნებისმიერი დავა უნდა გადაწყდეს მხარეთა შეთანხმებით, ხოლო ასეთის მიუღწევლობის შემთხვევაში, დავა განიხილება საქართველოში მოქმედი კანონმდებლობის შესაბამისად.

V. დამატებითი პირობები

8. გამანაწილებელი ქსელის წესებით დადგენილი პირობები წარმოადგენს, ელექტროენერჯის განაწილების მომსახურების შესახებ ხელშეკრულების განუყოფელ ნაწილს.

9. მხარეები ხელშეკრულებით ნაკისრ ვალდებულებას ასრულებენ კეთილსინდისიერების, მხარეთა ურთიერთანამშრომლობისა და გულისხმიერების პრინციპებზე დაყრდნობით. მხარეები ვალდებულნი არიან მჭიდროდ ითანამშრომლონ ერთმანეთთან (კონსულტაციის გაწევით, ურთიერთდახმარებით და სხვ.) ხელშეკრულებით ნაკისრი ვალდებულებების დროულად და სათანადოდ შესრულების მიზნით.

10. თითოეული მხარე ვალდებულია, მეორე მხარეს დაუყოვნებლივ მიაწოდოს ინფორმაცია იურიდიული მისამართ(ებ)ის შეცვლის ან მისამართის (მათ შორის ელექტრონული ფოსტის მისამართის) დამატების შესახებ, რაც სავალდებულოა მეორე მხარისათვის მიწოდების მომენტიდან.

11. ხელშეკრულებასთან დაკავშირებული მიმოწერა (კორესპონდენცია) შესრულებული უნდა იყოს ქართულ ენაზე.

12. მხარეები თანხმდებიან, იმოქმედონ საქართველოს კანონმდებლობით განსაზღვრული პირობებითა და პროცედურებით, იმ საკითხებთან მიმართებით, რომლებიც პირდაპირ არ არის მოწესრიგებული წესებით ან კომისიის მიერ დადგენილი სხვა აქტებით.

¹ სს „ენერჯო-პრო ჯორჯია“ (საიდენტიფიკაციო ნომერი: 205169066) ან სს „თელასი“ (საიდენტიფიკაციო ნომერი: 202052580) მათი სალიცენზიო არეალის მიხედვით.

² სისტემის ოპერატორი და მიმწოდებელი უფლებამოსილნი არიან დამატებით შეთანხმდნენ ანგარიშსწორების სხვა პირობებზე.

³ სისტემის ოპერატორი და მიმწოდებელი უფლებამოსილნი არიან დამატებით შეთანხმდნენ განაწილების მომსახურების საფასურის გადახდის უზრუნველყოფის სხვა პირობებზე.